



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 10

Mamata-i tang agi tasembenbuba
West Bengal CM tenangzükba agi

Küm teku sülen Javi Martinez-i
Bayern Munich toktsütsü



VOL. XVIII NO. 201 (ADOK 201) DIMAPUR

YANGTEPNÜ (THURSDAY)

MONUPII (MAY) 06, 2021

₹ 5.00

Lanur nem Coffee Making Machine agütsütsü: CM Rio LRD Kohima-i aluyimer 50 nem Coffee Pulpers agütsü



Kohima, May 5, 2021 (TYO): Bodbarnü Nagaland Chief Minister Neiphiu Rio-i district aser sub-division ajak nung lanur entrepreneur nem coffee making machine agütsütsü ta metetdaksüogo.

Land Resources Department-i Kohima district nung Coffee Growers 50 nem Coffee pulpers lema agütsüba sentong nung CM Rio-i iba osang metetdaksü.

"Nagaland nung Coffee lu ayimer aika akümba aser ano South Africa o Dubai-i bener

yokba atema pelar. Nagaland nung alirtemia asenoki tsünütetba coffee metettsüla aser iba jagi taküm district aser subdivision nung lanur nem coffee making machine agütsütsü" ta ta paisa ashi.

Nagaland nung coffee lu ayimtsü ali tajung lir aser 1980s nung Coffee Board of India (CBI) Nagaland-i aru saka training shitak manguba ajanga iba mapatong takok ngua meinyaktet, ta Rio-isa metetdaksü.

(Maneni tapak 2 nung...)

Guwahati nung containment zones sangoktsür

Guwahati, May 5, 2021 (Agencies): Kamrup (M) Deputy Commissioner Biswajit Pegu-i Guwahati nung ward 8 containment zone akümba osang metetdaksüogo.

May 6, 2021 nikongdang 2:00 ako nungi tenzüker anogo 14 atema containment zone nung tenokdangbatem tenzüksü.

Containment zone temji-Beltola, Basistha chariali, Fatasil, Ambari, Barshapara, Dhirenpara, Kumarpara, AT Road, MAchkhowa, Bhootnath, Khanapara, Panjabari, Hatigaon, Ulubari, Rehabari, Solapara, DGP Complex, Maligaon, Pandu, Narengi, Banda aser Bilpara lir.

Containment zone nung aonsotsü, süngjanglijang aser chiyungtsü ayokba dokantem anepdang 8:00 ako nungi anüngdang 12:00 ako tashi dang lapoktsü saka medical dokantembo akhi ama lapoktsü.

Maneni, item tesem nung mobile vending systems ajanga shi aser ango ayoktsü.

Tesüiba anogo 20 tsüngda Guwahati nung nisung 17,690 dak COVID-19 putetogo aser nisung 100 tema süogo.

Assam nung Mongulbarnü nisung 4,475 dak COVID-19 putetba nungi Guwahati aser temeket nung nisung 1,417 dena lir.

India nung COVID-19 ajanga nisung anasü agi timba asütsü akok

New Delhi, May 5, 2021 (Agencies): India nung coronavirus wara tanabuba ya taruba hoptatem ano tamajungba akümsü aser tasürtem tang dang nungi anasü agi timba asütsü akok ta asadangtetba osangtem metetdaksüogo.

Bangalore nung Indian Institute of Science nung telok kati tensa iba amai dang ora June 11, 2021 tashi nung nisung 404,000 shi taküm samatsü ta shiogo. Parnoki mathematical model ka ajanga iba ya asadangtet.

Ano, University of Washington nung Institute for Health Metrics and Evaluation ajanga July tatemen tashi nung India nung nisung 1,018,879

asütsü ta shiogo. India ama nisung aika aliba linük nung coronavirus aliba putettsüba tasak lir saka sample tendangba aser nisung o nisung tsüngda tepila ayutsü kanga rongdak nüngdak lir ta parnoki shiogo.

Parnoki asadangtetba amaji matalok nunga alima nung Covid-19 ajanga asür timbaji India nung ataloktsü akok. Tang tashi nung nisung timtiba asüba linüji United States (578,000) lir.

Bodbarnü India nung COVID-19 ajanga nisung 3,780 asüba osang angazükogo aser parnok züngsema tasür ajak agi 226,188 kümogo. Maneni, tanü nisung 382,315 dak COVID-19 aliba

COVID-19 Nagaland: Nisung 287 dak putet; 15000 adenogo

Kohima, May 5, 2021 (TYO): Bodbarnü Nagaland nung nisung timtiba dak COVID-19 aliba puteta nisung 15000 adenogo.

Tanü nisung 287 dak putet aser parnok züngsema nisung ajak agi 15,004 kümogo.

"Tanü nisung 287 dak COVID-19 aliba putet. Parnokji Dimapur nung 221, Kohima nung 59, Tuensang nung 2 aser Kiphire, Longleng, Peren, Phek o Zunheboto nung kaka (1) lir" ta Health & Family Welfare Minister, S Pangnyu Phom-i metetdaksü.

Nisung 15,004 rongnungi 12,390 taneptsü nguogo aser tang nisung 2,038 anepaludar, ta paisa ashi.

Nagaland nung COVID-19 nungi taneptsü angur 82.57%

dang kümogo, ta State Nodal Officer for Integrated Disease Surveillance Programme, Dr Nyanthung Kikon-ia ashi.

"Tang anepalurtem rongnung nisung 158 dak shirangba yimya tera lir, 18 tera shiranga oxygen agidar, 21 kanga shiranga oxygen agir, 3 kanga mejungi lir aser 4 ventilator nung lir. Nisung 1,834 dakbo shirangba yimya kecha mali," ta paisa metetdaksü.

Nagaland nung COVID-19 agi shiranger nisung 118 süogo saka parnok 10 bo tanga timtem ajanga asü. Nisung 458 tashi tanga state temi ogo, ta Dr Kikon-isa shisem.

Tang tashi nung Nagaland nung COVID-19 alitsü akok ta temolung melemi bilemba sample 1,50,142 tendangogo. RT-PCR

ajanga 80,002, TrueNat ajanga 38,500 aser Rapid Antigen Test ajanga 31,640 tendang, ta Dr Kikon-isa metetdaksü.

"Bodbar tashi nung Nagaland nung nisung 1,73,842 nem COVID-19 vaccine dose 2,20,399 agütsüogo" ta State Immunization Officer, Dr Ritu Thurr-ia metetdaksü.

Vaccine agirtem rongnung frontline workers 51,207, healthcare workers 14,847 aser arisi küm 45 ser temapur 1,07,688 lir, ta paisa ashi.

"Parnok rongnung nisung 46,557-i vaccine dose anaprong agiogo. Parnokji front-line workers 25,977, healthcare workers 9,925 aser arishi küm 45 ser temapur 10,655 lir" ta Dr Thurr-isa shisem.

Nagaland BJP district president temi sodi meshir; State president melentsü akhanger

Kohima, May 5, 2021 (TYO): Nagaland nung district BJP unit 6 tirtemi BJP national president J.P. Nadda dang sodi meshiogo.

BJP unit 6 tirtemji Nucutso Ruho (Phek), T John Panmei (Peren), P Demo (Noklak), T. Chopngsen Chang (Tuensang) aser Seyiekhrielle Nagi (Kohima) lir aser Yanthungo Kikon (Wokha) nungertem lir.

Bodbarnü DUDA Guest House conference hall nung osangbener den senden amendang parnoki Nagaland State BJP president Temjen Imna Along agientsü atema takhangba agütsüba nenshia metetdaksü.

District tir 6-i BJP national president J.P. Nadda dangi shidi züluba nung, State BJP president, Along ketdangsuba kübok teraksa talila majurudang BJP Nagaland sasep nung mepetmesü aliba angatetteptsü atema shia lir.

"Onoki taoba National General Secretary, BJP Ram

Madhav, National General Secretary Dilip Saikia, BJP National Spokesperson Nalin Kohli aser J.P. Nadda nung dang aiben mepishiogo. Nagaland nung "One Man, One Post" inyakyim tenzüksü atema onoki tongti süa mepishiogo, kechiyong tang teinyakdak State President ya MLA ka aser Minister ka lir. Pai mapa aika benloka inyakba ajanga BJP party Karyakartas nem mapang magütsüteter," ta district tirtemi tanü metetdaksü.

State president Imna Along aser pa den yaritepertemi tim mesüi inyaksangshiba ajanga party sasep nung mepetmesü adoka lir. Pa lenisüba kübok State General Elections 2023 nung Nagaland State BJP-i tamakok angutsü. Tang BJP MLA 12 lir saka yamai dang ora taruba election nungbo MLA 10 majungtsü, ta parnokisa ashi.

Onoki ashiba onüktem ya tim

dang aser ibaji November 3, 2020 nü 60-Pungro-Kiphire Assembly Constituency nung by-election osang ajanga sayur, kechiyong iba election nung BJP party candidate-i Independent candidate tem tsüngdang tamakok tulu angu. Anungji onoki national president Nadda dang tangsa onok District Presidents nungi anentsütsü mepishir, ajisüaka onok maneni party nung Karyakartas tajung kaka asütsü, ta parnokisa metetdaksü.

"BJP temzüng lateta aliba ama onok 3 atema shim aser onok indang kümsük 2023 nung tembangtsü" ta Wokha BJP tir Kikon-ia ashi.

"Ajisüaka, January 2020 nung State president Along-i mapa inyaksü tenzüksüba sülen district president tem kuli kecha magütsü dang anentsü. Pai June 2020 nung Phek district president Ruho mezüng anentsü," ta Kikon-isa metetdaksü.

Tang tashi nung district president ajak agienogo aser State president pusemertem district in-charge mesüra president tasen ama shimogo. Wokha aser Kiphire district tem nung dang president ano memelen lir, ta paisa ashi.

"District ketdangsurtemi mapa shitak meinyakteter kechiyong State president-i parnok kodang anentsütsü'ar memetet. Onoki party ajungkettsü atema temolung sadoka meinyaketer. Maneni, Nagaland State president-isa party indang senotsü tim mesüi amshir aser pai molungba ama dang inyaker anungji pa mapa nungi anentsütsüla," ta Kikon-isa metetdaksü.

Medicine, California nung infectious disease specialist & global health expert, Catherine Blish-ia metetdaksüogo.

COVID-19 WARA TASEMBUBAATONGTSÜ:

Bodbarnü Principal Scientific Advisor to the Government of India, K Vijay Raghavan-ia India nung novel coronavirus wara tasembuba adoktsü ta osang metetdaksüogo.

"Linük nung virus belenshiba ya reprangdangra, wara tasembuba mepaitoktettsü. Ajisüaka, tang tashi nungbo ibaji kodang adoktsü'ar meshitettsü. Asenok wara tasentem atema renemtsüla" ta Vijay Raghavan-i ashi.

putet.

"India atema taruba hopta pezü nungi trokji kanga tamajung asütsü" ta Brown University School of Public Health nung dean Ashish Jha-i ashi.

"India nung nisungtem dak COVID-19 tendangtsüla. Shirangertem dak dang tendangra, shirangba yimya malirtemi memeteti virus prokshitsü," ta Ashoka University nung professor Gautam Menon-ia ashi.

"U.S sorkari taoba hopta India nem rapid tests million 1 bener bener yoktsü nangzükogo. Iba wara azüoktsü atema teinyaktsü aika rongnung mask enoktsüba kanga tongtipang," ta Stanford

Pfutsero nung Block Level Task Force on COVID-19 senden amen



Block Level Task Force on COVID-19 senden ka ADC, Pfutserto indang Conference Hall nung May 03, 2021 nü ADC Pfutsero menden sür amenba mapang tangokba noksa ka yangi angur.

Dimapur, Monupii/May 05 (TYO): COVID-19 tashidak wara nungji jembua alitsü atema state sorkari teinyakstütem sangdongba nung ajemdaker Block Level Task Force on COVID-19 senden ka ADC, Pfutserto indang Conference Hall nung May 03, 2021 nü ADC Pfutsero menden sür mena liasü.

Iba senden nung sorkari SOP aser danga totuyubatem agüja aliba indang ADC ajanga tongmelang agi rateta lemsatet. Pfutserto Town nung aliba Pastor ajak den temeja senden ka mena guidelines balala sülen akang akanga anidaktsü indang jembia liasü, ta senden nung metetdaksü.

Pastor tem dang SOP nung aliba ama yimya amshitsü aser tashidak nungi nüburtem kumzüka ayutsü atema mera

balala agitsü asündang aser tashidak wara den raraba nung maneni parnok nungi amalitep alitsü ayongzüka liasü, ta ADC ajanga senden nung metetdaksü.

District balala tsünda aser district telungzük nung juri aser passenger garitem nung nisungtem shilem 50 dang amentsü melaba ajanga taxi para melenshitsü tim, ta angateta para melenshitsü indang jembia aser iba totuyuba agütsütsü lemtet.

Ketdangsür nungi temelaba magie dokan/business establishment kecha nunga osettsüset nung jenjang metemloksü lemtet aser Trade Union aser Consumer's Organization dang aibelenertem alinungbo ketdangsür nem osang agütsütsü nungloksü.

Senden nung ki kar nung

isolation room shidak maliba indang benoka jembia aser iba atema Ward Chairman/GB tem dang pei aliba colony nung isolation centre amenotsü tesem bushitsü ashi. Ajisüaka isolation centre nung amungertem atema chiyongtsü, aben-süoshi aser danga nüngdakbatem kinungeri anepalutsütsü, ta metetdaksü.

COVID-19 agi shiranger tali akumnungbo itemji anepalutsü atema CHC Pfutserto nung renema aliba den ano GMS Pfutserto aser Pfutserto Sports Complex indang TT Hall aser Restroom nunga Covid Care Centre amenoktsü iba senden nung lemtet.

Aser iba atema District Administration aser Pfutserto Town Welfare committee ajanga müngdakba osettsüset bendena anepalutsü nungloksü liasü.

COVID-19 agi shiranger nem Medico ajanga mozü angati agütsütsü

Dimapur, Monupii/May 05 (TYO): Linük ajunga nung COVID-19 tashidak wara agi timtem balala agütsüba asenok ajaki meteta lir, aser kasaji asen state nunga lir, ta M/s Medico, Dimapur kibur Basu Damani-i sangdong ka nung ashi.

Anogoshi state nung iba tashidak agi meneper zünba ya taoksatsü jenjang ka nung lir aser iba tashidak azüoktsü asoshi nübur ajunga lungjemer nokdaksü mapang tongtogo, ta sangdong ajanga ashi.

State tesem ajunga nung COVID-19 tashidak agi shiranger, shirnoki market nung mozü alitsü makoker, parnok nem mozü angati agütsütsü

atema M/s Medico, Dimapur indang kibur Basu Damani aser Arvind Damani nati molungteta liasü.

District Task Force tawabangba kübok Covid Centre nungi police densema teyari nüngdaka aliba shirangertem mozü alitsü agütsüba tejangja bener arur nem M/s Medico ajanga mozü angati agütsütsü, ta sangdong ajanga ashi.

Iba maparen nung District Administration, Commissioner of Police, Medical Superintendent, Nodal Officer for COVID-19 aser Assistant Drug Controller, Dimapur nungertemia yariteptsü shiogo.

Mozü ya Lions Club, Dimapur nungi anogoshi anepdang 10:00 ako nungi nikongdang 1:00 ako tsüngta aser nikongdang 3:00 ako nungi 5:00 ako tsüngta meshitetsü akok. Shiranger indang kinunger mesüra temelen yokba nisungi 'prescription' bener arua mozü ya meshitsü akok, aser iba mapang COVID-19 protocol tem shidak amshitsü, ta sangdong ajanga ashi.

Danga nung aliba shiranger temia 'prescription' den mozü abeni arutsüpur tenüng aser mobile number tem WhatsApp number 9612633069 dangi yoker mozü ya abeni arutsü akok, ta ash.



Kohima, Monupii/May 05: Kohima nung May 5, 2021 aonung nungi 'Night curfew' tenzüka mapang police temi gari aser nüburtem senzüsempongba nokdangba noksa nung angur. State yimtiba nung COVID-19 cases kanga kera zünba mechi aser state sorkari Kohima Municipal Council kübok aliba tesemtem 'containment zone' ta sangdongba yong Kohima district administration ajanga municipal ward 19 aser New Capital Complex küboki aitiba colony tem nung May 5, 2021 aonung nungi 'Night curfew' ya benoker.

Kohima nung garitem Odd-Even system amshitsü

Kohima, Monupii/May 05 (TYO): Containment zone ta sangdonga aliba Kohima Municipal Council aser New Capital Complex nung nija meyong garitem Odd-Even yimya nung jajatsü melatsü, ta Deputy Commissioner, Kohima, Gregory Thejawelie, NCS ajanga sangdong ka nung metetdaksü.

Sangdong ajanga ashiba agi, Hombar, Bodhbar aser Hokulbar anogotem nung gari registration Odd number (1, 3,

5, 7, 9) agi tembanga alibatem senzütsü melatsü.

Mongulbar, Brehostibar aser Honibar anogotem nung gari registration Even number (2, 4, 6, 8, 0) agi tembanga alitem senzütsü melatsü.

Iba totuyuba nung aibelenertem Motor Vehicle Act 1988 indang Section 177 & 179 kübok merenshitsü, aser iba totuyuba ya May 5, 2021 aonung 7:00 ako nungi tenzüka anogo tenet (7) tashi amshitsü, ta sangdong ajanga ashi.

Osettsüset nung jenjang metemloksüla: KMC

Dimapur, Monupii/May 05 (TYO): Kohima Municipal Council kübok aliba shishilempar ajak dang osettsüset nung Office ajanga nung aliba ama ayoktsüla, ta Administrator, Kohima

Municipal Council (KMC), Kovi Meyase ajanga sangdong ka nung metetdaksüogo.

Iba totuyuba nung aibelener nem ozüng agi melaba ama merenshitsü, ta sangdong ajangasa ashi.

Wokha DC Office-i nisung aruba nokdang

Dimapur, Monupii/May 05 (TYO): Nagaland Chief Secretary ajanga sangdongba den bendenloksema aser state nung COVID-19 tashidak tali akumba nungi kumzüka alitsü aser jelia mera balala agitsü mechi Deputy Commissioner, Wokha indang Office-i nüburtem aruba tang nungi

tenzüka nokdanga atar, ta Deputy Commissioner, Wokha, Orenthung Lotha ajanga sangdong ka nung metetdaksü.

Ajungben rongdak nüngdak alitem kisung arutsü melar aser iba totuyuba ya tarutsü nung osang tasen ka mesadong tashi amshia atatsü, ta sangdong ajanga ashi.

Wokha district nung taxi nung senzürtem atema metetdaksür

Dimapur, Monupii/May 05 (TYO): Home Department, Nagaland State Disaster Management Authority ajanga totuyuba agütsüba nung bendenloksema, Deputy Commissioner, Wokha ajanga sangdong ka nung, Wokha district kübok tesem balala nung jajaba passenger gari/taxi tem talenba kar yur senzütsü melar, ta metetdaksü.

Taxi anir aser teyarir aser passenger ajungai teti mask agitsüla, passenger tem amshitsü atema gari nung teti hand sanitizer ayutsüla, mask agia aliba passenger tem dang senzütsü melatsüla, meta talangi aoba garitem kechi südir süaka mapusodang gari müreksüla

asere mesen tepsetba mozü akhatsüla, ta sangdong ajanga ashi.

ILP/Govt. official ID card shidak maliba non-local tem gari nung amentsü memelatsü mesüra check gate kata alema meyoktsü, taxi para April ita latetba ama alitsü, Sumo nung nisung pongu, Alto nung nisung asem aser Ecco (6+1 seater) nung nisung pezü amentsü melar, ta sangdong ajanga ashi.

Item totuyuba ya District Administration, Police aser DTO temi mita reprangtsü. Iba totuyuba ya Wokha district ajunga nung May 4, 2021 nungi tenzüka tarutsü nung osang ka magütsü tashi amshia alitsü, ta sangdong ajangasa ashi.

Lanur nem Coffee Making... (Tapak 1 nungi...)

Nagaland nung Land Resources Department-i ketdangsüa coffee plantation tenzüksüshio aser tang nisung aikati coffee lu ayimer. Naga Coffee ya kanga sapur kechiyong asenoki mozü mamshir aser teronem tajung lir, ta paisa ashi.

Nagaland nung rongsenkettsüing inloktsü atema industry aser factory mali anungji coffee lu ayimertemi state rongsenkettsüing jenjang ajungkettsü atema tetenzüker asütsü ayongzüker, ta Chief Minister Rio-isa ashi.

Kohima district nung coffee lu ayimer nisung 1,886 lir aser parnok 109-ibo coffee tsünüa

ayoker, ta paisa shisem.

"Nagaland nung ali hectare 10,40,100 tashi coffee lu ayimtsü atema temsüa lir. Robusta atema hectare 3,55,300 aser Arabica atema hectare 6,84,800" ta District Project Officer, Land Resources Department, Kohima, Dr. Menuosietuo Tseikha-i metetdaksü.

Tang ali hectare 7996.2 shi ka nung coffee lu yima lir, ta paisa ashi.

Iba sentong nung mendenji Assistant Inspector, LRD Kohima district Agnes Phewhuo liasü aser Assistant Project Officer, PRD Kohima district Sentinungla-i anküp tepela o jembia

BSF Tripura Frontier-i Covid Care Centre 12 lapok



BSF Tripura Frontier-i Covid Care Centre 12 lapok

Agartala, May 5, 2021 (Agencies): Tripura nung Covid19 kanga prokshiba mapang ka nung BSF Tripura Frontier-i Covid Care Centre 12 tashi lapokogo.

BSF-i lapokba Covid Care Centre nung yipden, mozü, oxygen cylinders, oxygen concentrators, oxy-meters aser PPE kits lir.

BSF Tripura Frontier inspector general Susanta Kumar Nath-i sector commanders aser battalion commanders den Covid19 tensa atema rongdak senden ka ayonga menogo aser iba

mapang BSF sepaitem aser local civilians kümzüka ayutsü atema renemtsü jembitep.

"BSF Tripura Frontier-i Covid Care Centre 12 lapokogo" ta Border Security Force (BSF)-i metetdaksü.

Onoki partitioned quarantine centres nunga yipden 4,000 tema renema lir, ta BSF-isa ashi.

"Shirangertem anepalutsü atema senior medical officers aser paramedics renema lir" ta BSF deputy inspector general (DIG) DP Singh-ia ashi.

Shirangba yimya malirtem pei pei isolation centres-i

yoktsü aser shirangba yimya alirtem Covid Care Centre temi anir aotsü.

State balala nung Assembly elections 2021 agiba sülen BSF sepa 3,000 den timba Tripura-i meyipa arur.

Sepaitem state tongli Covid19 tendangtsü atema BSF-i civil administration den yariteper.

Bodbar tashi nung BSF sepa 19,300 tashi Covid19 vaccine mezüing dose agiogo aser sepa 15,800 temai tanabuba dose agiogo, ta BSF sangdong ka nung metetdaksü.

Manipur nung COVID-19 positive miimbangba atema senchi achi

Imphal, May 5, 2021 (Agencies): Manipur kübok Tamenglong district nung nisung anati COVID-19 positive miimbanga yur Mongulbarnü Imphal nungi passenger gari ka nung mener aoba atema senchi chiogo.

"Tenaji Happy Villa nungi Maningsibou (25) aser Awangkhol nungi Gaikhangongliu (28) ja lir. Tena dak Senapati district kübok Mao Gate nung COVID-19 aliba putet" ta Tamenglong district magistrate, Armstrong Pame-i ashi.

Ajisüaka, tenati COVID-19

positive miimbang ayu aser Imphal nungi Tamenglong-i bus gari ka nung aru, ta paisa metetdaksü.

Imphal-Tamenglong passenger bus gari nung nisung 5 mener aru aser parnok rongnungi nisung 2 dak COVID-19 putetogo.

Tenati coronavirus positive miimbangba atema tenaprong dang Rs 1,000 senchi chiogo, ta district magistrate-i ashi.

Iba bus gari nung mener arur ajak anogo 14 atema home quarantine sütsü aser bus mozü agi merüktetba sülen ang senzüdaksütsü, ta paisa ashi.

Meghalaya nung küm million 100 tain dinosaur terettem ngutet



Shillong, May 5, 2021 (Agencies): Meghalaya nung researcher temi küm million 100 tain dinosaur indang terettem ngutetogo.

Meghalaya kübok West Khasi Hills District nung sauropod dinosaurs indang fossil bone ngutet.

Tawa tu Geological Survey of India (GSI) nungi researcher temi field trip arudang

terettemji angu.

Northeast nung Titanosauria nungi poktetba sauropod ddinosaur indang teret angubaji tang mezüing lir ta researcher temi ashi.

Tang tashi nung Meghalaya dak aliba India kübok Gujarat, Madhya Pradesh, Maharashtra aser Tamil Nadu state tem nung dang Sauropod terettem nguteta lir.

Jorhat nung COVID-19 ajanga nisung 1 asü; Union Bank shibangtsü

Jorhat, May 5, 2021 (Agencies): Assam kübok Jorhat nung COVID-19 agi nisung ka asü aser iba nisung züingsema Jorhat district nung nisung ajak agi 83 süogo.

"Chengaliati nung alir arishi küm 80 tain Bhadai Bora asüba züingsema COVID ajanga asür ajak agi 83 kümogo" ta Jorhat Deputy Commissioner Roshni A Korati-i metetdaksü.

Mongulbarnü Garali nung aliba Union Bank nung mapa inyaker 5 dak COVID-19 putetba sülen containment zone kümogo.

Mongulbarnü Jorhat district

nung nisung 124 dak COVID-19 aliba puteta liasü aser parnok züingsema nisung ajak agi 13,943 kümogo.

Mongulbar tashi nung nisung 13133 taneptsü nguogo aser 652 anepaludar, ta Deputy Commissioner DC Korati-isa ashi.

DIBRUGARH NUNG ZALONI TEA ESTATE SHIBANGTSÜR:

Maneni, Dibrugarh district nunga Zaloni tea garden nung mapa inyaker 90 dak Covid19 putet.

Iba ajanga Dibrugarh district administration-i Zaloni tea estate ya Containment Zone ta sangoktsüogo.

Assam nung süngolu nung mapa inyaker temi tentetba telok balalai süngolu nung mapa inyaker nem Covid19 vaccine agütsütsü atema takhangba agüja arur.

"Onoki sorkar dang tea estate nung vaccination drive agitsü atema ayongzüka arur saka ibaji meinyaker. Süngolu nung mapa inyaker temi tepila meyui mapa inyaksangshir aser iba jagi melamela menateptsü akok. Covid19 wara tanabuba ya mezüing dang nungi kanga agi tamajungba lir" ta Assam Tea Tribes Students' Association (ATTSA) lennir kati ashi.



Züingsem 126 agi akümba Assam Assembly nung taoba kümsük nung tetsür MLA 8 liasü saka tanbo parnok 6 dang kümogo. Taküm Assam Assembly election nung candidate ajak agi 946 liasü aser parnok rongnungi tetsür candidate 74 (7.%) liasü. Tetsür candidate tem rongnungi BJP nungi 3 (Ajanta Neog, Suman Haripriya, Nandita Garlosa), Congress nungi 2 (Nandita Das, Sibamoni Bor) aser aser AGP nungi 1 (Renupama Rajkhowa) nungertemi takok angu. (Guwahati, May 5)

West Bengal nungi aruba Mizoram police 62 dak COVID-19 putet

Aizawl, May 5, 2021 (Agencies): West Bengal assembly election nung shilem agir meyipa aruba Mizoram Police 62 dak COVID-19 putetogo. Bodbarnü Mizoram nung nisung 238 dak putetba rongnung parnok dena lir.

Parnok ya April tatemlen state tonga aruba sülen quarantine nung lir, ta ketdangsur kati ashi.

Tang tasen putetertem rongnung Assam Rifles sepa 2, Border Security Force (BSF) jawan 1, healthcare workers 2 aser kibong ka nungi nisung 6 dena lir.

Taoba hopta West Bengal nung election duty nungi arur

police 109 dak COVID-19 aliba puteta liasü.

Tesüiba ghonda 24 tsüingda sample 3,218 tendangba nungi 238 dak COVID-19 aliba putet. Mizoram nung nisung 5,168 taneptsü nguogo aser tang nisung 1,609 anepaludar.

Tang tashi nung COVID-19 ajanga nisung 17 süogo aser sample 3,16,793 tendangogo.

Mongulbar tashi nung teintet rogo 54,924 dena nisung 2,16,789 nem COVID-19 vaccine mezüing dose agütsüogo, ta state immunization officer-ia metetdaksü.

Parnok rongnungi nisung 46,751-i vaccine indang dose anaprong agiogo, ta paisa ashi.



TIR YIMYIM YIMOBILEM (EDITORIAL)

DIMAPUR YANGTEPNÜ, MONUPII (MAY) 06, 2021

Aonsutsü & süngjanglijang ayokdak

Tang alima nung alir ajak Covid-19 tashidak agi amokbanger tounüleri mao aser teinyaknüsü meinyaki shisaboluseta aliba mapang ka, asenok asoshi osang tajung kaji tang nungibo aseni züsentetba aser bendenba aonsutsü aser süngjanglijangtem shitoka meindoki jenjang dalang agi ayoktsüsa, Dimapur nung aonsutsü aser süngjanglijangtemji tamajung mekümdaktsüi itemji shidoker aser tilala kuma lensar jungjunga konger ayoktsüsa Nagaland State Agricultural Marketing Board-i Dimapur nung machine tajung bener arua amenokogo. Atangji, aluyimertemi züsentetba aser bendenba aonsutsü aser süngjanglijangtem tamajung mekümdaktsüi temekong nung ayutsüsa district shia nung Cold storage ki tulu tajung kakabo state government-i yangutsüba osang angashiogo aser government file nung item kitemji yangluba osangtem alitsü. Ajisüaka, Nagaland asünungji, ashiko, file nung renemba dak alaka aluyimertem asoshi yanglutsüba cold storage kitemji district aika nung malitsüa akok aser aliyonga light junga maruba agi junga mamshiteti alitsüa akok. Item tamakoktemji yutsür, tang Dimapur nung Agri Expo nung Agriculture department purtemi yaküm küm nungi Air Condition market ka lapoka yangji aluyimertem dang nungi mozü mamshii züsentetba aonsutsü aser süngjanglijangtem alizüka tangalen ayoktsü tenzükbaji asen lima nunga rongsenren nung asentenshiba mapa ka asütsü. Asen lima nung ya aonsutsü aser süngjanglijang tapu balala aika kanga junga aluyimertemi tsünütetter aser arem nunga parnoksa meiteta adokba aser atangba süngolemba aser süngjanglijangtema tajung aika Tsüngremi moaja lir. Ajisüaka, itemji tamajung aser tamakitsü mekümdaktsüi bendena ayokdak maliba ajanga asen lima ya takar ser nung asenok takar mekümtet timtema mapang talangka lia arur. Aji oda, aonsutsü aser süngjanglijangtem ajak rongnung temelatiba züsentetsü akokbaji süngmok aser somomo nungertem ya asütsü, ajisüaka tayokdak makaba den asenoki itemji koma konga amshitsüar memetetba agi asenok peri tera chirbo tanüngbajibo, tapayutsüka, tamajung kümer endokba tensa mapang aiben ajuruogo. Joko, tangbo item takoksatem to majurutsüsa tang Dimapur nung Agri purtemi lapokba tesem nung ya aluyimertemi süngmok, lasüng, mersü aser süngjanglijangtem pei pei district nung kümteta aliba Agricultural Marketing Board ajanga yoktetsü. Asenoki metettsüba kaji, alima nung chiyongtsü tapu balala shishilembaba yimya nung bendangba inyakyim nung, aonsutsü asüyonga koba nungsa metsüjang lir, itemji süngjang ama züngshir, anungji mersü, bingana, squash, mapu, luli aser menti nungertem ajak ya aonsutsü ama masü saka süngjang ama züngshir. Asen lima ama, chiyongtsü tajung züsenteta jangratema alitsüsa tzü mopong aser ali temo tajung moaja alidak lima nung ya asenoki asenoksasa chiyongtsü timi züsenteta alu ayimtsü aser ayoktsü meteta inyakra, shitakba mamatzü aser ninang mojitsü talubosa angudak limaji asen lima ya ka asütsü. Asen lima ya Israel lima den medemdangra, anasü agi asen lima yasa tajungba, kechiyong Israel limaji lisem lima aser tatsük, anungji asen lima nung ama süngdonglidonga junga memeir saka parnokibo lisem limaji tzü mesür arua ali temo aliba lima ka kümdakja alu yimtetter aser parnok lu nung züsentetba aonsutsü aser süngjanglijangtem asen lima tashi tonga bener arua ayoker. Itemji tanü asen lima lanurtem asoshi tayongzükba tongtibang ka asütsü. Asen nisungtem ya tanüa azümasenbo masü saka asenoki mapa inyakyim mashiba ajanga mapa mangu timtema alir. Aluyimba tsütsüa tang tashi machine amshia ayimer masü saka alulem aser mertsüng agidang ayimer, iba jagi asenoki alu junga meyimtetter. Ibaji tsüraburtem masü saka tanü putu tasenba nung lanurtem tamakok asütsü. Putu ka nungi ka melena aodang, nisungtem dang masü saka mapa shia inyakyima tajungba aser tezübaba kuma melenshia aoer. Ajisüaka, asenok lanurtemi asen lima takar kuma aientsü atema putu tasen nung inyakyim tasen kecha purapiteta meinyaktetba ya alima tsüngdang tamakok dang masü saka maksü asütsü. Asenok tsürabur sen chitsüa kaketreju tapu balala nung zünger " Educated Unemployed" kümer kazüba tetezü ya asenoki asenoksasa ratettsü merangra, asenok aoksatsü aser iba jagi asen taküm nung tetezü tajung ka ratettsütsü. Joko, tanü putu nungbo asenok "educated" süra tsüraburtem dang nungi inyakyim tajungba nung aluyima chiyongtsü chir mechima ayoktsüsa züsentettsüla. Aji oda, asenok "Educated" süra asenoki asenoksasa mapa repringteta inyaktsüla. Tanü asenok aika "Educated" ser kazüba agi asen lima mainer, kechiyong educated lanurtemi peisasa pei kolok, pei shisatsü aser pei mang arakzüka putu yimya den apet mapa purapiteta meinyak tashi süng long putu nungi E (electronics) putu metongtetsü. Ibaji meteta educated lanurtem asentenshir asen lima ya chiyongtsü züsendak aser ayokdak lima ka kümdaktsütsü imlar.

OLEMSABANG

Arogoi aser Laishiri yamai Clean Election nung shilem agidaktsüner

I. Meyionen Jamir

Representation of the People Act, 1951 section 123 nung Corrupt Practicesindang shia lir. Iba section nung Bribery nungi tenzüker sempet agütsüba, vote mechi teyari agütsüba, yaritsüatema nangzüktepa ayuba, amokmerenba, pei kin aser yimtsüng nungi aridokba/jentokba, kin o kin na tsükchiteptsüsa jembishinüba aser inyaksangshiba ajak shia angutsü. Corrupt practices in election ya süngjang dang lir. Ali aser teraji rakpoka repringdangtsüla aser mesen mesüra tashidak kechi agi süngjangji mejungdaktsür, aji tepseta endoktsüla. Anungji prescription agütsütsü asoshi tamasa Diagnosis jungjunga akitettsüla. Tanü Clean Election campaign aser tesayuba, inyakyimtemji repringdangra prescriptive measures dang teimba ama ajiteter. Asenoki tashitakji jungjunga diagnose asütsüla.

Tanü asen tendak: Vote sen agi ayoker, mapa agütsütsü nangzükteper, temesepba yi jemteper, camp lapoker chiyungtepa kazüteper, senso candidate shimer, yimsüsür alizüker, senso candidate support masüba atema yimtsüangi maitdaktsür, yimtak nungi aridoker, senso nungi jentoker, vote magütsüdaktsür, voters slip malemer/rakzüka ayur, proxy vote agütsür, nisung teshimtet kari dang vote agütsür, booth capturing mapa inyaker, tashiyim mapa inyakteper, nisung tepseter. Tetemsü ochishir candidate doktsür candidate shibai sen teimba agütsür iba candidatejidang shimer. Ano ibala mesükba tamajung mapa jenti inyaker.

Clean Election dak sendakba nung NBCC level nung 1972 nungi tenzüker, ABAM aser yimtsüng arogotemi küm aika meranga inyaka arudaki. Ano talisa Langpangkong Kaketshir Telongjemi ayonger Clean Election Campaign kanga meranga nübur nem tangatetba agüja senzüogo. Oda Langpangkong nunger yimtsüng ajak atenshia Tenangzüktepa dena akiogo. ABAM tsütsü nungia Pledge Card arogopurtem sign sütepogo, wako-a songogo aser yamaji tangatetba balala agüja arur. Candidatetem Impuri jaoka aiben sarasademogo. Aor yimtsüng ajunga amai Tetsürtemi kanga meranga yi meitba/apuba mapa küm aika inyaka arudar. Ano kechi meinyak? memerangdang? Arogo aser responsible social organizationtemi khen dang masü saka aiben aser election shia sarasadema tajungba inyaktsü merangogo. Aji saka tamajungba-tamajungba dang akümer. Ya koda asü? Kechi tai? Shiba tamakok? Shiba dak atongtsü? Asenok ajaki shisadangtsü asoshi Yanglushidi Sensaksem Sabang tenzüka asoshi pelaa bilemer.

Item memerükba, tamanger memesüki beshiba mapa tamajung anema Arogoi aser talisa Laishiri shilem magii odang ajia toktsütsü masü saka Tsüngrem tsüngdang temenen tongpang nung noktaker ama shilem agitsüji kanga tim. Shitakba jembidi süra, item Election dak sendakba mapa tamajung tamangertemi maneni inyakba jagi Arogo tamakok sayur. Asen lokti nung temenen tongpang tulutibaji iba ya masüna? Kodang tamanger ka ama asenoki Ochi jembitsü? Arogo aser Laishiri anir mapusora ano shiba dak yimlatsü? South African political liberation mapang nung Theologian Bishop Desmond Tutu ama, shibai Nobel Peace Prize angu, ano American theologian aser Baptist Pastor Martin Luther King Jr. ama alima aser nübur temeden asoshi noktakba (Civil Rights Movement), teyanglushir ka ama asenok rongnung Arogo nung tenzükertem talisa toklang tenzüker aser Laishir kwikati shilem tajung agitettsü?

Otsüla-obula nunger par putu yimli yimsüsüba menden asoshi nübu shimtetba yimya nung kanga dang asüngteta inyaka aru. Rongsen agi yimsüsüba menden alizükba sobaliba khenyongi mali asü. Naga nunger ochishir aser mapa meranga inyakba kin ta bendang semer-i jembia aru. Sen yong parnokki par principle yoka achiba mangashi. Sen otsü parnokki mejembi. Asenoki tsürabur senmang tajung junga mamangtet südi. Anungji asen tsüraburtem ochishiba tanela senmang mamangtettsüsa kechi agi asenok menentsü? Asen Naga nunger traditional ethos (moral beliefs and practices) nungji tajung kechisa lir itemji reclaim asü nung jungdisü? Honesty, contentment, dignity of labour etc. Is there any way that they can act as ante-dote for today's materialistic and accumulative ideology? Theologizing process, talisa tribal/indigenous theology nung iba ya tongtipang masü na? Saka anogoshia nenok Tsüngrem tenzükertemi sayuba aser jembiba nung iba ya tongtipang shilem ka kümdaktsütsüla. Naga Khristanji "Naga" nungji tera junga yanga melira foreign/worldview jagi dangbo chichiba tamanger taküm ka melitettsü asü na ta tebilemdangtsü onük ka lemsateper.

(Maneni asüung adok nung angutsü...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**



May 4, 2021 nü Siliguri anasa Sahudangi Crematorium nung coronavirus tashidak agi shiranga asürtem tasümang rongdokba noksa nung angur.

US nunger Khristantemi India nung aliba Arogotem yaritsü

May 05, 2021: United States nung Catholic Near East Welfare Association (CNEWA)-i India nung local Arogotemi coronavirus agi kongshirtem yariba maparen nungita yaritsü atema emergency campaign ka tenzükogo, ta Bodhbarnü CNEWA Tir, Peter I. Vaccari-i metetdaksü.

India lintük nung coronavirus tashidak agi kongshirtem yaritsü atema tenla agütsüdaksüner, ta mepishia Peter Vaccari-i, "Asenoki iba ama tensa ya repranga dangbo meyütsüsüla, saka parnok den timtem lemsatepba den külemi nüngdakbapurtem yaritsüla," ta metetdaksü.

Coronavirus wara prok tenzükba mapang nungi tang tashi nung India nung nisung

million 20 tema dak coronavirus putetogo, ajisüaka iba tashidak agi shirangertem iba dang nungjagi kanga agia timba asütsüa akok, ta aikati bilemer, kechiyong nisung aikati iba tashidak metendangi shiranga kidang asür.

India nung iba tashidak agi nisung 220,000 dak tema süogo aser tang India nung aliba hospital aika nung yipten maliba den külemi oxygen agi meperiba agi nisung jenti südar.

Peter Vaccari-i, emergency funds ajanga India nung Vatican agency partners yaritsü aser ibaji ajanga Arogotemi personal protective equipment (PPE), medical teyari, chiyungtsü aser vaccines alia agütsütsü, ta metetdaksü.

T e m e l u n g e r t e m i www.cnewa.org/india ajanga;

phone number 800.442.6392; mesüra mail, CNEWA, 1011 First Avenue, New York, NY 10022-4195 ajanga senotsü tenla agütsütsü akok. Tenla ajak nungjagi saru agütsütsü aser tax receipts angutsü.

Tesüiba küm 80 dak tema CNEWA-i India nung Syro-Malabar aser Syro-Malankara Catholic Arogotem den külemi inyaksema arur.

Kerala state nung amenoka aliba office tem ajanga CNEWA-i India nunger sensakertem, Khristan putirtem aser nun tem atema sentong balala ayongzüka katsür.

Tang India nung coronavirus wara agi nisung jenti timtemba mapang nung alima tesem balala nung Khristan organizations balala India nunger yaridar.

Beijing nung aliba Zion Arogo nung sayutsüngir ana apu

Beijing, May 5, 2021: April 28, 2021 nü police ketdangsertemi China yimtiba, Beijing nung aliba Zion Arogo nung sayutsüngir ana kidang nungi puer ogo, ta International Christian Concern (ICC) osang ajanga metetdaksü.

Tang anenja aliba Zion Arogoi parnok atema sarasademjang ta mepishia metetdaksüogo.

Police ketdangsertemi April 28 aonung 11:30 ako meta Changping district nung iba Arogo nung sayutsüngir, Qie Jiafu puer ao. Arogo züngsemtemi metetpelatsü atema Shahe Police Station dangi aiben call asü saka pa kechi atema puer aoar memetetdaksü.

April 30 anepdang 1:00 ako meta police-i Qie kinüngtsü dangi phone call süa la dang, Qie-i Regulations on Administrative Penalties for Public Security kübok Arrla 54

anema inyakogo anungji pa anogo 10 nü pua ayutsü, ta metetdakja liasü. Iba dak alia Qie dang senchi Yuan sen (US sen 77) chiogo.

Kasa mapang nungjisa sayutsüngir, Huang Chunzi-a puer oa liasü saka la puer aobaji anogo asem sülen ang Arogo züngsemtemi metet.

Huang mezüng apuba mapang nung la ghonda 72 pua ayu. Ketdangsertemi la apuba osang mesüra la kong ali mesüra la kong puoka lir, item osangji memetetdaksü.

Arogoisa sayutsüngir Huang atema sarasademjang ta mepishia metetdaksü.

2007 küm tenzükba Zion Arogo ya mapang ka nungbo Beijing nung house churches rongnung tulutiba liasü aser iba Arogo nung Amongnü shia tamanger 1,500 tashi adenshia tekülem sentong agia liasü, ajisüaka 2018 küm iba Arogo shibangtsü.

Iba dak alia Zion Arogo Pastor, Ezra Jin Mingri danga küm asem tashi linük toktsür maotsü tuyua liasü. Ketdangsertemi pastor kibong bendangleni maotsü tuyuba agi lar jala, Grace Jin-a 2019 küm July ita nung Law school ka nung join mesütem.

ICC Regional Manager for Southeast Asia, Gina Goh-i, "Zion Arogo nung sayutsüngir ana apubaji ajanga Beijing nung house churches ajak anentsütsü nükjidong aliba kuli jangjar. May 1 nü nungi tenzükba 'Administrative Measures for Religious Clergy' benokogo aser China sorkari tamangba yimsü lenirtem ajak nem Chinese Communist Party tangatetba ajungketdaksüner. Yamaji meinyakra reshikangshi ajurutsü. Tang China nung Khristantem reshikangshiba ya alima nem metetdaksütsüla," ta ashi.

ANOGO ABEN TSÜNGREM DEN

Balaka Süang

Saka Danieli pei mulung chubar chiyongtsü tajung mesüra pai yi ajemba agi pa sasa memenentsü ta mulungtet. Daniel 1:8.

Tsüngremi shibai na aja aser Pa Tanela agi süngdaksü, pai na ajanga mapa tulu inyaktsü akok ta nai amanger asü? Tsüngremi na ajaba aser mapang aser na alidak tetsüngdaji nai atongtepdangogo ma? Alima nung tatalokbatemi Tsüngrem aoksadaksütsü makok. Nükjitung ka asoshi na kong lir idakji pai tejangja metetta lidaktsür.

Danieli pa mapang nung tatitangbai Kibuba den tesendaktep nung timtem magütsüdaksü. Tsüngrem tsüngdang pa taküm tagizüktetsü südaktsütsü asoshi mapa ajak nung tashi angatsüla ta pai metetta liasü. Alima tashi taitba chubai agütsüba ozüng hau ta meli-i Tsüngremi pa nungi kechi aginer aji chuba ozüng den memeyoktepdaksü.

Khristantem shirnoki Tsüngrem yimli asoshi Tsüngremi parnok lenmang balaka amshitsü ta amang parnok tatishitsü agi otsü sünga lir. Esteri nüburtem kümzüktsü asoshi lendong mapang ka nung Tsüngremi Ester chubar obendang yutsü (Ester 4:14). Ejip nung Pharaoh yarir tashi taitiba asütsü aser Yakob aser par kibong yawara nungi kümzüktsü asoshi Yosef yutsü (Lipok 41:39,40).

Ne taküm kümzüktsü asoshi nai na meketa aliba mapangtem jagi na anishidaktsür asü? Mesüra nür putu nung na balaka asütsü asoshi Tsüngrem nükjitung aser tanü ne taküm asoshi Pai mulungba jungkai adoktsütsü Tsüngrem dang asüngdangang.

Evangelical lenir kati India nung Covid atema sarasademtsü ayongzüker

May 05, 2021: North India nung Evangelical lenir, Finny Philip-i, coronavirus wara agi Arogotem aika kongshiogo aser nüburtem aika timtemdar, ta shia tamangertem dang covid wara atema sarasademtsü ayongzüker.

Philip Finny ya Filadelfia Bible College (Udaipur, India) nung Principal inyaker aser Pentecostal Arogo ka nunga pastor inyaker.

"Linük ka ama asenoki tensa tamajung ka ajangshidar. Anogo shia nisung 2,700 dak tema asür aser nisung lakh 3 tema dak iba tashidak puteter," ta pai metetdaksü.

"Ozü Arogo nunga züngsem kar Covid tashidak agi süogo aser züngsem 60 dak iba tashidak puteta kidang yaridar. Filadelfia Fellowship Church of India nunga pastor ana kinüngtsü iba tashidak agi süogo aser tamangertem aikati timtem ajangshidar," ta pai metetdaksü.

"Linük nung Khristan hospital temi timtemertem yaridar, anungji tang ama mapang nung doctor tem aser medical staff tem asoshi sarasademtsüdi. Linük nung Khristantemi lenmang balala ajanga timtemertem yaridar. Khristan teloktemi ano taliba amalitepa inyaktsü atema asenoki sarasademdi," ta paisa ayongzüker.

India nung Khristan lenir aikati linük nung iba wara prokba anentsü atema May 7 nü sarasademtsü ayongzükerogo.

Mumbai nung Catholic Bishops' Conference of India Tir, Oswald Gracias-i shidi ka ajanga putirtem dang linük nung iba wara prokba anentsü atema Tsüngrem dang teyari meshia May 7 nü sarasadem sentong ayongzüka agitsü metetdaksü.

Pai Arogotem dang, "Tang anogo shia linük nung nisung 300,000 tema dak coronavirus puteta arudar. Wara tanaben prokshiba ajanga tsunami lendongi kongshiba ama asenok kongshiogo aser iba dang nungjagi tamajungba akümtsü. Asalentong majungba den külemi hospital tem nung yipten peria mali, antiviral mozü aser vaccine peria mali. Iba tensa ya ano tamajungba akümtsüa akok," ta metetdaksü.

Putir, Gracias-isa nüburtem jak dang coronavirus vaccine agitsü ajungshi.

Mamata-i tang agi tasembenbuba West Bengal CM tenangzükba agi



Kolkata, May 05, 2021: Bodhbarnü Raj Bhavan, Kolkata nung West Bengal Angh, Jagdeep Dhankhar-i ketdangsüa TMC tongti, Mamata Banerjee nem Chief Minister tenangzükba agidaksüba noksa nung angur.

Kolkata, May 05 (Agencies): Bodhbarnü Trinamool Congress tongti, Mamata Banerjee-i tang agi tasembenbuba West Bengal Chief Minister inyaksü atema tenangzükba agiogo.

Bodhbarnep Raj Bhavan, Kolkata nung state Angh, Jagdeep Dhankhar-i ketdangsüa la nem sorkar tenangzükba agidakja liasü.

Tenangzükba agiba sentong nungji TMC lenirtem- Partha Chatterjee aser Subrata Mukherjee, election asalentong yanglur mongin, Prashant Kishor aser Banerjee'er kinünger Abhishek Banerjee nung densema liasü.

Tenangzükba agiba sentong tembangba sülen Mamata-i, "Bengal elections achaayanger ajak dang ni pelar. Coronavirus anema raratsüji onok atema

tongti mapa asütsü. Tanabuba nung rara aziüoktsü atema ni yimtenren party ajak dang mepishir. Tanü nungi tenzükba kü ket nung ozüing amtsü. Iba tensa aziüoktsü atema ni police tashi amshitsü," ta metetdaksü.

Election osang sangdongba sülen state tesem balala nung TMC aser BJP pusemertem tsüingda rara adoka tang tashi nung nisung 12 süogo.

Mamata Banerjee-i aniba Trinamool Congress-i West Bengal Assembly elections nung takok anguba osang sangdongba aonung party ana pusemertem tsüingda rara tenzükba liasü.

Osang angazükba agi, Hombarnü Purba Bardhaman district nung raraba mapang TMC pusemer asem aser BJP nung inyaker ka asü. Samaspor aser Galsi nunga rara adoka

liasü. Ato kilonser, Narendra Modi-i Mamata-i Bengal nung chief minister inyaksü atema tenangzükba agiba atema la nem tenüngsang agütsüba sülen lai Centre dang nungi maneni teyari angutsü imlar, ta ashi.

Social media ajanga Mamata-i, "Narendra Modi, nai tenüngsang agütsüba atema nü dang pelar. West Bengal terenlok atema maneni Centre dang nungi teyari angutsü imlar. Iba wara aser tanga tayongzükba balala anema raratsü atema ni amaliteptsü aser longjemer inyaksü ni imlar, aser ibaji ajanga Centre-State tesendaktep tajungba akümtsü," ta metetdaksü.

Tawa agiba election nung Trinamool Congress-i menden 213 nung takok angu aser BJP-i menden 77 nung takok ngua liasü.

India nung ano nisung lakh 3.8 dak Covid putet aser 3,780 asü

New Delhi, Monupii/May 05 (Agencies): India linük nung ano coronavirus tashidak agi shiranger 3,780 süogo; India nung coronavirus prokba sülen tang tashi nung anogo ka kija nung nisung timtiba asübaji ibai asütsü.

India nung ano nisung 3,82,315 dak coronavirus putetogo aser ibaji densemabotang tashi nung nisung ajak agi 2,06,65,148 dak iba tashidak puteter; linük nung iba tashidak agi nisung 2,26,188 süogo, ta Bodhbarnep Union Health Ministry data ajanga metetdaksü.

Tang tashi nung linük nung iba tashidak agi shiranger crore 1.69 anepogo (shilem 82.03), ta Health Ministry-isa metetdaksü.

Tang linük nung iba tashdak agi teshirangdakpur 34,87,229

lir, aser ibaji coronavirus caseload nungi shilem 16.87 lir.

Bodhbarnü Indian Council of Medical Research (ICMR)-i ashiba agi, May 4, 2021 tashi nung linük nung samples ajak agi 29,48,52,078 tendangogo aser iba nungji Mongolbarnü samples 15,41,299 tendangba densema lir.

Tesüiba ghonda 24 tsüingda iba tashidak agi asürtemji (3,780) Maharashtra nung 891, Uttar Pradesh nung 351, Delhi nung 338, Karnataka nung 288, Chhattisgarh nung 210, Punjab nung 173, Rajasthan nung 154, Haryana nung 153, Tamil Nadu nung 144, Jharkhand nung 132, Gujarat 131, West Bengal nung 107 aser Bihar nung nisung 105 asüba densema lir.



May 05, 2021 nü Mumbai nung 'drive-in vaccination' kübok teintet senso ka nem coronavirus vaccine agütsüba noksa nung angur.

Covid wara tasembuba 'wave' atema renema alitsüla: Vijay Raghavan

New Delhi, May 05 (Agencies): Bodhbarnü sorkar atema Principal Scientific Advisor, K Vijay Raghavan-i, linük nung coronavirus wara

tasembuba 'wave' arutsü, anungji asenoki iba atemaji renema alitsüla, ta metetdaksü.

Linük nung coronavirus tensa dak sendakba nung osangbenertem den jembidang Raghavan-i, "Wara shilem tasembuba proktsü, kechiyong iba wara kanga prokdar, ajisüika koba mapang ka nung tasembenbuba proktsüar mejangjar," ta metetdaksü.

Health ministry-i ashiba agi, Maharashtra, Karnataka, Kerala aser Uttar Pradesh densema state 12 nungbo state shia nung coronavirus tashidak agi teshirangdakpur lakh 1 dak tema lir.

Kasa osangbenertem senden nung Health Ministry nung Joint Secretary, Lav Agarwal-i, "Tebilemtsü onük kar lir. Tesüiba hopta ka tsüingda Bengaluru kija nung nisung lakh 1.49 dak iba tashidak putet aser Chennai nung nisung 38,000 dak iba tashidak putet. District kar nungbo coronavirus tashidak agi shirangertem kanga kera anepogo aser item district rongnung Kozhikode, Ernakulam aser Gurugram densema lir," ta metetdaksü.

Tang India nung tesüiba hopta ana tashi anogo shia nisung lakh 3 tema dak coronavirus tashidak puteta arudar; hospital aika nung yipten tazüing mali aser oxygen den mozü peria maliba agi iba tashidak agi shiranger aika südar.

Sorkar akümtsü atema Tamil Nadu Angh Purhohit-i Stalin jaok



May 05, 2021 nü Chennai nung DMK Tir, MK Stalin aser party lenirtem Raj Bhavan-i oa sorkar akümtsü atema asüngdangtsü asoshi Tamil Nadu Angh, Banwarilal Purohit ajuruba noksa nung angur.

Chennai (Tamil Nadu), May 05 (Agencies): Tamil Nadu nung sorkar tasen akümtsü atema Bodhbarnü state Angh, Banwarilal Purohit-i DMK Tir aser Legislature Party lenir, M.K. Stalin jaoka liasü.

May 7 nü Raj Bhavan nung tenangzükba agiba sentongji kanga tongmelang agi dang agitsü, ta ketdangsertem osang ka ajanga metetdaksü.

Purhohit-i ketdangsüa Stalin aser pai aniba Council of Ministers nem tenangzükba agidaksütsü.

Bodhbarnep Stalin leniba nung party lenirtemi Raj Bhavan nung Purohit ajurua sorkar akümtsü atema asüngdanga liasü.

Stalin den party General Secretary Duraimurugan, Treasurer T.R. Baalu aser

Rajya Sabha MP, R.S. Bharathi nungeri Angh nem Stalin DMK legislature party lenir shimba bangzüing agütsü.

Stalin-ia Purohit nem tang election nung takok angur 133-i pa pusema sign asüba shidi den Council of Ministers list agüja liasü.

Tamil Nadu nung April 6, 2021 nü Assembly election agi, aser iba election nung DMK-i

aniba teloktepi menden 234 nungi menden 133 tashi nung takok angu.

Parnok den teloktep party tem- Congress Party-i menden 18, VCK-i menden 4 aser Left party anati menden anana nung takok angu.

Tamil Nadu nung tongti party anaprong (DMK aser AIADMK) ya secular party lir, ajisüika taoba mapang AIADMK lenir aser taoba chief minister, asür Jayalithaa-i minorties den tesendaktep junga ayuba aser BJP pur indang Hindutva politics magizükba agi state nung la anema takok angur maliasü.

Tan agiba election nung DMK-i takok anguba ya AIADMK-i BJP den teloktep yangluba agi asütsüa akok ta bilemer.

AIADMK-i minorities indang tebilemsü onük balala atema ola madokba dang masü saka Parliament nung par MP temi Citizenship Amendment Act (CAA) pusemba agi minorities aikati parnok nem vote magütsü.



Hanover, Germany anasa Wunstorf nung aliba Wunstorf Air Base nungi Air Force Airbus A400M tayimtsü ka ayamesoba mapang tangokba noksa nung angur. Mobile oxygen production unit aliba German military cargo aircraft ya linük north tsütsü Wunstorf airport nungi India-i apusogo, kong coronavirus agi shirangertem yaritsü.

USainshitsü anogo süyiba sülen Afghanistan nung khatap

Kabul, Monupii/May 05 (Agencies): Southern Helmand province nung Taliban teloki amakba nung Afghanistan sepaitemi meyiper rara liasü, ta ketdangsürtem aser yangji alirtemi ashi. United States mitkartem iba linük nungi ainshitsü anogo süyimba sülen tesem balala nung telungpur temi lendong agütsür.

Helmand provincial council nung tekolakba, Attaullah Afghan-i ashiba agi, Hombarnü Taliban teloki tesem balala nungi amak tenzük. Province yimtiba, Lashkar Gah temeket nung checkpoint tem nung parnoki amak aser yangji alir kar parnoki pua bener ao, ta pai ashi.

Item tesem nung afghan security forces temi tayimtsü amshia amak aser elite commando forces tem yoka liasü. Lendong agütsüba tesem nungi iba telok meyiba yokogo saka Mongulbarnüa maneni khatapa liasü aser kibong noklang aika tesem balala nung jenshia lir, ta paisa ashi.

"Yimti nung nok-o-nü ola tulu liasü aser menti asanger amai prangbong tila indang olatema angashi," ta Lashkar Gah nung

alir Mulah Jan-i osangbener dang ashi.

"Ni ozü kinunger ajunga takdang ka kinükleni anir ao, aser ola tulu adoka apokba aser prangbong ola ya ozü ki kishi nungi adoker amai angashi," ta pai ashi.

Iba tesem nungi kibong aika jena ogo, saka par kibong jena motet aser parnok tetsübu nung lia Taliban telok meindok.

Afghanistan nung US aser British sepaitemi küm 20 raraba mapang opium tsünüba lilem lima, Helmand nung par züngsem aika asü.

US sepaitem Afghanistan yutsür aoba nung shilem ka ama anogo ana tejakdang Helmand nung parnok amenoka aliba tesem ka Afghan sorkar meyong sepai nem agütsü.

Washington nung US sepaitemi ashiba agi, sepai anizüker arutsü aliba maparen shilem ana nungi trok tsüngta renemogo.

C-17 tayimtsü 60 mimh asem osettsüset Afghanistan nungi bener ainshio go aser raksa indoktsü atema hadir tejang 1,300 dak tema agütsüogo, ta United States Central Command ajanga ashi.

Helmand den külemi sepaitemi tesüiba ghonda 24 tsüigta danga province trok nung Taliban den rarar, aser item rongnung southeastern Ghazni aser southern Kandahar dena lir, ta Afghan defence ministry ajanga ashi.

Helmand nung Taliban züngsem 100 dak tema tepsetogo, ta defence ministry ajanga ashi. Ajisiüaka parnoki Afghan security forces asüba osangbo magütsü. Taliban teloki telanzüba kecha agüja mali.

May 1 tashinung US sepaitem anizüker aotsü atema taoba küm taoba Tir Donald Trump kübok molungtepa liasü. Tir Joe Biden-i sepaitem ya anogo lateta aliba alema atatsü aser ita pezü ser tesadang ka shi nung anir omatsü ta sangdong, saka Taliban-i magizük.

Ajisiüaka iba anogo atongtsü lia Hokulbar nikongdang Logar province nung gari ka nung bomb inoker pokdaksüba lendong nung nisung 30 jungnüa asü.

Hombarnü southwestern Farah province nung army outpost ka bushia Taliban teloki longpok toa arur yangji bomb pokloktsüba mapang Afghan sepai tenet takum sama.

Bulgaria nung July 11 nü election agitsü: Tir Radev

Sofia, Monupii/May 05 (Agencies): Bulgaria nung April 4 nü election agiba nung parliament tali loksa aoba sülen asemben tashi sorkar ka tentettsü merangba nung tamakok ajuruba ajanga July 11 nü parliamentary election agitsü, ta Tir Rumen Radev-i Bodhbarnü metetdaksü.

Ato Kilonser menden nungi alusang Boyko Borissov'er centre-right GERB teloki küm ter shi Bulgaria yimtenren amokbanger aru, aser taoba ita election agiba sülen parnok ya party tulutiba liasü, saka ochimashi maparen inyakba ajanga nüburtem mepelai menden aika sama.

Borissov-i parliament nung nübu timtiba monguteti teloktep sorkar tasen ka meyanglutet nung, tiri TV host Slavi Trifonov-i aniba telok tasen ka dang sorkar tentettsü nungloktsü,

saka takok mongutet aser parliament tasenba nung party tulutiba jenjang asembuba nung alir Socialists temia sorkar tentettsü makok.

"Bulgaria nung tashi tait yimten nüngdaker, koba tang aliba parliament-i meyanglutet," ta Radev-i Socialist Party ajanga sorkar tentettsü merangba meyiptsüba sülen ashi.

Borissov-i ashikülak aser süpokrem mapa inyaker pua merenshitsü makokba atema kanga sashia aitsüsang Radev-i temelen mera agitsü mongutet nung khen atema technocrat administration ka shimtetsüsa akumer aser ita ana tsüngta election agitsü lemtet.

Radev-i May 11 tashinung election commission tasen ka shimtetba sülen election ya agitsü akok, ta ashir.

"Taruba hopta ni parliament

shibangtsütsü aser khen atema sorkar ka shimtetsü. Aser iba ama tensa nung election ya July 11 nung agitsü imlar," ta Radev-i ashi.

Radev-i ashiba agi, khen atema minister tem shimba nung takotet nübutem alitsü aser yangji Socialist Party nungi züngsemtem dena alitsü, shirnoki pa tir menden asoshi toktepa nung yaritsü ta shiogo.

Denpasar, Bali, Indonesia nung osangbener senden ka nung adenba sülen Indonesian immigration officer kati Russian influencer Leia Se, achichi, meiner aoba noksa nung angur. Se-i mask agitsü ozüng yanglua aliba sülen manidaki video ka yanglur la indang social media nung prokshiba mechi la ya Bali asetkong nungi Bodhbarnü meinzüka yok.

Mali nung tetsür kati khen nung tanur teku aso

Bamako, Monupii/May 05 (Agencies): Mali tsür kati tanur teku soa alima nung iba ama tanur asor telok tilaka nung züngsemogo, ta Mali sorkari ashi.

Arishi küm 25 tain Halima Cisse mashisa akumba ajanga linük ajunga süngmang aser lenirtemia meteta akum. March ita doctor temi Cisse ya yimya balaka nung anepalutsü nüngdak, ta ashidang ketdangsürtemi la ya Morocco-i anir ao aser yangji lai Mongulbarnü caesarean section (tetsü pok nungi tanur rangtetba) ajanga tetsür pongu aser tebur pezü aso.

"Kinü tanurtem aser tetsü temang junga lir aser parnok hopta ishika lir kidangi meyipa

shilangtsü," ta Mali indang health minister Fanta Siby-i sangdong ka nung ashi.

Siby-i Mali aser Morocco nungi medical team dang pelaba lemsatempa liasü.

Morocco aser Mali nung ultrasound agiba mapang Cisse yagi tanur tenet asotsü imla liasü, aser iba mapang tanur ana mongujem.

Tetsürtemi khen nung tanur tenet aser teku bena tajungtiba nung asoba ya aiben mataloker.

Iba osang ya Morocco ketdangsürtemibo ano mejangja lir. Linük nung aliba mozüki ka nung iba ama tanur asoba osang nibo memetet, ta Morocco health ministry indang odongtar Rachid Koudhari-i osangbener dang ashi.

G7 senden nung India ketdangsür dak COVID-19 putet

London, Monupii/May 05 (Agencies): Bodhbarnü London nung Group of Seven foreign minister tem senden alidang India nungi senden nung adeni aor ana dak COVID-19 putetba sülen India foreign minister aser par telok ajunga isolation nung lir ta sangdongba sülen senden nung adener tsüputepa liasü.

Anogo asem agitsü aliba senden ya Britain-i ayongba lir aser iba senden ya ajanga anüolen linüktem China aser Russia anema lungjemer nokdakba sayutsü maongka agütsür. G7 senden ya küm ana nung tang mezüngbuba agir alitsü.

Alima nung COVID-19 cases ya India nung tesashitiba jatetba mapang ka lir, aser tesemdanger ka ama G7 senden nung adener aser parnok ya Mongulbar nikongdang aser Bodhbarnü senden nung shilem agitsü liasü.

"Covid positive cases alir den ajurutepa alitsü akok ta yashi nikongdang onok nem metetdaksü," ta Indian Foreign Minister Subrahmanyam Jaishankar-i Twitter nung ashi.

"Kumdanga alitsü aser dangartem atema bilemja ni virtual mode nung shilem agitsü telemtetba agi. Kasaji tanü G7 senden nunga alitsü."

Ibai chichiba G7 senden June ita English resort ka nung agitsü lia jelia amenba senden ka lir. June ita G7 senden nungya US Tir Joe Biden aser danga linük nungi lenirtem adentsü sentong lir.

British ketdangsüri nisung ana dak COVID-19 putetba metetdaksü aser India nungi arur ajunga self-isolation nung lir, ta ashi. British nunger ozüng nung

anogo ter self-isolation nung alitsü shia lir.

India nungi arurtem ya Lancaster House nung senden tonggiba nung maden, anungji Bodhbarnü atema senden ayonga aliba ama agi.

Ketdangsür kar dak COVID-19 positive putetba mechi tsüngdong arua senden agitsü ya mera tai ka asü, ta asüngdangba mapang, "Sorkar ka ama teinyaktsü tim maneni inyaktü merangtsü kanga tongtipang ta bilemer," ta Ato Kilonser Boris Johnson-i ashi.

Johnson-i Bodhbar nikongdang Zoom ajanga Jaishankar den jembitsü, ta ashi.


G7 züngsemtem senden nung adentsü aruba mapang British foreign minister Dominic Raab-i parnok agizüka liasü.

"Tanü senden nung Jaishankar tsüngdong arua medentetba atema kanga sasar. Yamai sübayong COVID protocol takhang benok aser anogoshi tendanger," ta UK diplomat kati ashi.

Mongulbarnü Lancaster House telung nung senden nung adenertem tetsüngta nung plastic screen yuja liasü.

Jaishankar ya Mongulbarnü British interior minister Priti Patel den ajurutepba noksa nung nguogo, saka Patel ya self-isolation masür, kechiaser ozüng agi melaba ama senden mena liasü. Tenaprong mask agir senden nung adenba noksa nguogo.

G7 nung India ya züngsem masü saka Britain-i iba senden nung adentsü atema Australia, South Africa aser South Korea den külemi jaoka liasü.



Oxygen Concentrators anepalutsütsü atem NGO ka den Hooda longjem

Monupii/May 5, 2021 (Agencies): Actor Randeep Hooda-i Mongolbarnü Instagram nung video ka ajanga oxygen concentrators anepalutsütsü asoshi pa NGO ka den longjemba sangdongogo. Linük ajunga nung oxygen agi anüngtepba mapang Covid agi kongshir alirtem atema Randeep aser NGO, Khalsa Aid na longjemer concentrators 700 bosa anepalutsütsü nükjidong lir.

Video nung Randeep-i, placards balala sayuogo, kong

"India Oxygen nungdaker", "Minutes 4 shia Covid-19 agi nisung ka asür", "Crematoriums aser leper nung taremdak makai kümдар", aser "nai senti taküm ka kümzüktettsü" ta zülur liasü. Paisa, nüburttem dang iba inyakyim atema tenla tajung tenlatsü mepeshia metetdaksü.

"India nung wara tamajungtiba pokteter aliba mapang nisungtem oxygen agi anüngba agi südar aser iba mapang nung nai nisung taküm ka kümzüktettsü. Asenok ajak longjemer COVID den rarati

aser senti taküm ka kümzükti. Khalsaid_india-i oxygen concentrators agütsüdar aser onoki nenok dang tejak dangi arua India tangula sashitsü atema teyari agütsütsü mepeshir," ta Randeep-i zülutsü.

Mapa dak sendakba nung Randeep Hooda-i, "Radhe: Your Most Wanted Bhai" nung antagonist shilem agiba angutsü. Iba film nung Salman Khan aser Disha Patani nati tongti shilem agütsü. Prabhu Deva-i direct asüba film ya May 13 nü digitally sayatsü renema lir.

Snapdragon 480 Chipset aketba Oppo A54 sayaogo



aser 10W fast charging support asüba 5,000mAh battery ka densema lir.

Oppo-i parnok indang A-series phone tem aika 5G phone küma yanglushidar aser tawa company-i Oppo A94 5G aser Oppo A74 5G na 5G phone küma yanglushiogo. Company-i Oppo A54 4G variant sayatokogo, koba India nunga ngudar. Iba phone nung MediaTek Helio P35 SoC inokja lir.

Monupii/May 5, 2021 (Agencies): Oppo company-i A-series smartphone lineup nung budget 5G phone; Oppo A54 sayaogo. Iba smartphone ya shishilembdak kar nung dang angutsü aser company-i linük balala nung kodang sayatsü iba indang osang tejangja agüja mali.

Oppo A54 nung Qualcomm Snapdragon 480 processor ka inokja lir koba jenjang dalang agi ayokba phone tem nung 5G connectivity agütsütsü asoshi design süa yangluba lir. Tanga tongtibang feature tem rongnung quad rear cameras

Specifications dak sendakba nung Oppo A54 5G nung 6.5-inch full-HD+ (1,080x2,400 pixels) display ka den 180Hz touch sampling rate tashi 90Hz refresh rate, aser 90.5 percent screen to body ratio keta lir. Phone tejaklen tekolak nung tabelenlen selfie camera atema hole-punch cutout ka lir koba 4G phone den kasa asütsü.

Maneni phone nung Qualcomm Snapdragon 480 processor den Adreno 619 GPU aser 4GB LPDDR4X RAM aser 64GB, UFS 2.1 storage keta lir. Storage capacity ya microSD card ka ajanga atsülanga

amshitettsü.

Tesülen camera system nung 48-megapixel primary camera ka den f/1.7 aperture, 8-megapixel ultra-wide-angle den f/2.2 aperture, aser 2-megapixel shooters ana densema lir. Tejaklen selfie aser video calling atema 16-megapixel selfie shooter ka inokja aliba angutsü.

Oppo A54 5G nung camera app tem rongnung AI Scene Enhancement 2.0, AI Beautification amala densema lir. Iba phone indang operating system ji Android 11-based ColorOS 11.1 out-of-the-box asütsü. Tanga tongtibang features tem rongnung Bluetooth v5.1, GPS, NFC, 3.5mm headphone jack ka aser USB Type-C port ka densema lir.

Oppo A54 5G 4GB RAM + 64GB storage variant ya EUR 219 (approx Rs 19,400) agi angutsü. Iba phone ya Fantastic Purple aser Fluid Black sentü nung angutsü. India nung iba phone kodang sayatsü iba indang osang tejangja mali.

The Weeknd-i 2021 BRIT Awards nung shilem agitsü

Monupii/May 5, 2021 (Agencies): 2021 BRIT Awards nung The Weeknd-i shilem agitsü, ta osang ajanga metetdaksüogo, koba tesem balaka nung tangoktsü aser May 11 nü sentong agiba mapang sayatsü.

US nunger nüngtugu kentener, shiba International Male Solo Artist atema züngoksema lir, pai iba sentong atema pa shilem tang mangaokba mapang lir.

Source ka ajanga Sun newspaper Bizarre column dang ashiba agi, "Abel-i Brits nung shilem agitsü mulunga agizükba ya sentong ayongertem atema takok tulu.

"Pai tatemsa iba sentong nung 2016 küm shilem agiogo. Iba mapang nung pa career tetenzüker dang liasü, anungji pai tanaben meyipa arua shilem agiba ya jangrademtsüka asütsü."

"Coldplay ama, shirnoki sentong lapokba shilem London



indang O2 Arena nungi pilar tangokogo, yamaji Abel-ia inyakttsü."

"Pai sentong agiba tesem nungbo shilem magitsü saka pa indang production ya taküm küm atema tulutiba aser jangrademtsü taketba sentong ka asütsü," ta source-i ashi.

Coldplay den külemi Olivia Rodrigo, Dua Lipa, Arlo Parks, Rising Star-winner Griff aser Headie One nungeria iba sentong nung shilem agitsü.

BRIT sentong ya UK nung tawa kilung nung agiba sentong tulutiba asütsü, kong tejaoker 4000-i shilem agitsü.

Sentong nung shilem agirtem mask asemtsü mesera tetsüngda ita inyaksangshitsü nüngdak madoktsü.

Ajisiuka parnok ajaki coronavirus tendangba negative result agütsütsüla.

Kasa mapang nung COVID nungi jenboa alitsü atema jenjang agibatam takok angu mangu tendangtsü atema parnok

ajak dak sentong tembangba sülen tashidak tendangtsü aser kar dak danga tashidak potetra NHS Test agitsü aser Trace tenzükttsü.

Taküm award atema nominate asürtem rongnung Dua, Arlo, Joel Corry aser Young T & Bugsey nunger timba lir.

Taküm BRIT Award akokertem nem trophy anana agütsütsü, koba iba show indang puti otsü nung mezüngbuba asütsü.

Nüngtugu artists Es Devlin OBE aser Yinka Ilori MBE na longjemer iba trophy design süogo.

Kasa mapang nung taküma iba sentong ya küm pezübuba atonga Jack Whitehall lenisüba nung agitsü.

MULUNGNEN O



Aso:
12.05.1961

Asü:
29.04.2021

Onoki teti akümstüba aser meima aliba asür **Nungsangrenla Aier (Süngratsü)** shiranga aliba mapang nungi tasü nü tashi shirnoki sarasadem, rongsen, shisatsü aser nübu agi mulungsoa yariogo nenok ajak dang kanga pelar.

Tsüngremi temalen nungi nenok ajak moatsütsü onok teimla aser sarasadem.

Temeim jalatem, anükapang, semchir aser kinungertem.

AR-i medical camp ka ayongzüka katsü



Dimapur, Monupii/May 5 (TYO): Assam Rifles Civic Action Initiative 2021 nung shilem ka ama AR Kiphire Battalion-i, May 3 nü Kiphire District kübok Tsurevong aser Longkhimong yimtsüng nung medical checkup camp den repsema COVID-19 Awareness Drive sentong ka ayongzüka katsüogo.

Medical team-i, temang tendangtsüba den mozü aser

COVID-19 dak sendakba tanga tenüngdakba osettem agütsü. Iba camp kanga takok nung agiogo, kechiyong iba camp mapang nisung 77 nem teyari agüja liasü.

Maneni Covid-19 tashidak menar aika kümyonga aoba mapang kümdangshia alitsü atema iba camp nung tangazükba balala agütsüogo. Camp ajanga tantsür tamburtem, tetsür aser tanurtem ajangzüko.

Bengal nung BJP züngsem 14 tepsetogo: Nadda



Kolkata, Monupii/May 5 (Agencies): West Bengal nung election tembangba sülen BJP züngsem 14 tepsetogo aser nisung lakh ka shi pei ki toktsür jenshiogo, ta shia BJP tir J P Nadda-i Bodhbarnü chief minister Mamata Banerjee-i ola madokba ajanga iba ken o nung la densema aliba sayur ta ashi.

Election result sangdongba sülen nisung tepsetba aija Nadda-i, state kübok tesem balala nung BJP atema inyakerkem tepsetogo aser tetsürtem dak tashiyim mapa benshiogo, ta ashi.

Bengal assembly election results May 2 nü sangdongogo aser Trinamool Congress-i menden 292 nungi 213 kokteta

term asemubaba atonga sorkar kümtetogo.

"Mamata Banerjee-i mepetmesü adoker aliba dak sendakba nung ola madokba ajanga la densema aliba sayur. La teka nung azü melanga lir," ta Nadda-i Kolkata nung osangbenertem den sensaksema mapang ashi.

State nung mepetmesü adoker aliba ya state-i teyari agütsüba ajanga ta shia pai, TMC-i election akokba sülen nisung 80,000 nungi lakh ka shi pei ki toktsür jenshiogo, ta ashi.

Canning Purba constituency nung BJP züngsemtem mezüngmeshia amshiba den yimtsüngtem raksatsüogo, ta pai ashiba den nüburttem taoba küm Amphan yipru ajangshio aser taküm Mamataphan ajangshir ta ashi.

BJP tir-i state semdangba mapang Mongolbarnü pai TMC züngsemtemi merenshiba party züngsemtem ki semdangogo.

Paisa, north Bengal district nung aliba nüburttem pei taküm kümzükttsü atema kidanger state Assam-i jenaogo, ta ashi.

India-i Australia nunger asayartem yaritsü

Monupii/May 5, 2021 (Agencies): BCC-i, Indian Premier League (IPL) nung asayaba Australia nunger asayar ajaka Maldives mesera Sri Lanka-i anir aotsü, ta Cricket Australia tekolakba Nick Hockley-i Bodhbarnü ashi.

India nung COVID-19 tensa tamajungba akümba ajanga IPL mapang telatet ka makai Mongolbarnü thinenogo, saka iba telemtetba agiba ajanga Australia nunger asayartem aser bendanger asayartem linük toktsür aotsü asoshi lenmang bushitep tenzükogo.

Australia-i India nungi shinga

marudaktsüsü telemtetba agiogo, ajisüaka CA interim Chief Executive Hockley-i shiba agi, asayartem India nungi pilar tanga tesem ka nung anogo 14 mungzükerang kidangi aotsü ta ashi.

"Onoki iba atema inyaktep dar aser BCCI-ia jenjang tapet agidar aser parnoki kanga teka amteper inyaka asayartem ajak India nungi anintsü inyaktep dar," ta Hockley-i Sydney nung osang benertem dang ashi.

"Asayartem Maldives mesera Sri Lanka-i anir aotsü. BCCI-i tang jenjang agidar aser taruba anogo ana asem tsüingda iba sentong ya ataloktsü," ta pai ashi.

Hockley-isa, Indian board-i Australia nunger asayartem kidangi anir aotsü atema charter plane ka anepaludar ta ashi.

Australia-i May 15 nü tashi India nungi shinga marudaktsüsü telemtetba agiogo.

Australian Cricketers' Association-isa, taoba Australia nunger batsman aser IPL team ka indang coach Mike Hussey dak COVID-19 tashidak potetba metetdaktüsügo.

ACA tekolakba Todd Greenberg-i, IPL nung shilem agiba Australia nunger rongnung Hussey dak dang corona potetba jangja lir ta ashi.

Küm teku sülen Javi Martinez-i Bayern Munich toktsüsü

Monupii/May 5, 2021 (Agencies): Spain nunger football asayar tejen Javi Martinez-i Bayern Munich toktsüsü atema telemtetba agiogo, ta Bayern sangdong ka ajanga Mongolbarnü metetdaktüsü. Telok anapronglai mulunga agizükba sülen iba telemtetba agia liasü.

Munich-i 2012 küm Athletic Bilbao nungi Martinez euro million 40 agi alizük.

2013 aser 2020 küm asayamung asemsem akokba Munich team nung arishi küm 33 tain Martinez-i densema liasü aser club nungi asayaba mapang pai ajak senteper takok marok 23 koktetogo, ta DPA sangdong ka

ajanga metetdaktüsü.

"2012 küm Javi Martinez den tenangzüktepba yangluba mapang telemtetba agitsü kanga tasak liasü, kechiyong iba mapang nung pa alizükba taa euro million 40 ya otsü tasen ka liasü. Ajisüaka telemtetba shidak agiogo," ta Munich mendenbuba Karl-Heinz Rummenigge-i ashi.

Board züingsem Oliver Kahn-ia, Martinez ya küm teku tashi team nung nükdang tongtibang ka liasü aser iba mapang nung club-i otsü tasen aika yangluogo, ta ashi.

Kasa mapanag nung board züingsem Hasan Salihamidzicia, Martinez-i ajangzükbatem ya

aika denbo medemdangtsü makok, ta ashi.

Tir Herbert Hainer-i, "club puti otsü nung Martinez ya teti kanga tongtibang asütsü," ta ashi

Martinez shiba tarutsü mejangjai lirpai, "Ni iba club atema dang liogo aser club atema ajak agütsüogo aser club den külemi takok aika ngutetba atema ni kanga pelar. FC Bayern aser fan tem kü mulung nung teti alitsü," ta ashi

Bayern sangdong ajangsa, David Alaba, Jermome Boateng, aser coach Hansi Flick den külemi Martinez atema FC Bayern-i season tatem tepila sentong tajung ka ayongzüka katsüsü, ta ashi.

Roma head coach sütsü Jose Mourinho shimogo

Monupii/May 5, 2021 (Agencies): AS Roma-i, club indang head coach asütsü Jose Mourinho shimogo, ta club sangdong ka ajanga Mongolbarnü metetdaktüsü. Pai 2021-22 season nungi tenzükka küm asem Roma achaayangtsü.

Season tembangba sülen coach Paulo Fonseca-i club toktsüsü sangdongba sülen iba telemtetba agia liasü.

"Jose Mourinho AS Roma

family-i aniochtsü onok yongyaa atar," ta club tir Dan Friedkin aser vice-president Ryan Friedkin nati ashi.

"Jose ya jenjang ajak nung takok tajung ngur aliba nisung ka lir aser pai onok nükjidong atongtsü atema teyari tulu agütsüsü," ta tenatasa ashi.

Mourinho, shibai taoba mapang Porto, Chelsea, Inter Milan, Real Madrid aser Manchester United nung coach

mapa inyakogo, pa Tottenham-i ita 17 sülen mapa nungi anenja liasü.

"Club kibur aser Tiago Pinto den ajurutepba sülen ni AS Roma atema parnok nükjidong angateta aküm," ta Mourinho-i ashi.

"Roma fan tem tejangraba ajanga iba mapa agizüktsü atema ni ajungmesoa liasü aser taruba season atema matateter," ta paisa ashi.



Japan kübok Sapporo tesem nung Tokyo 2020 Olympics test event ka ayongzüka asayaba mapang half-marathon asemtepba noksa nung angur. Track and field world governing body tekolakba Sebastian Coe-i, half-marathon test event ayongzüka agiba ajanga Tokyo Olympic marathon takok ngua agitettsü ta temulung lema bilemba lemsatetogo.

Babar aser Fakhar na ICC Player of the Month atema shimogo

Monupii/May 5, 2021 (Agencies): Pakistan nunger batsman Babar Azam aser Fakhar Zaman na Bodhbarnü April ita atema ICC 'Player of the Month' award asoshi shimogo. South Africa den asaya nung kanga junga asayaba sülen tena iba naroküm atema shimogo.

ICC-i Bodhbarnü international cricket formate ajak nung tetsür aser tebur cricket asayar tajungtiba nem tetushi agütsüsü atema nominees tem sangdongogo aser tang mezüingbuba list nung India nunger ka danga mali.

Pakistan nunger asayar ana dak alia Nepal nunger batsman Khushal Bhurtel-a teburtem rongnungi player of the month naroküm atema züingoksemogo, ta ICC sangdong ka ajanga metetdaktüsü.

Tetsürtem rongnungi Australia tsür Healy aser Megan Schutt na aser New Zealand tsür Leigh Kasperek nunger iba naroküm atema nominate süogo.

Taoba ita Pakistan captain Babar, ICC ODI Player Rankings nung temaba jenjangi tua iba jenjang India captain Virat Kohli-i mapang telangka bener aliba tembangdaktüsügo.

South Africa den tasembuba ODI asayaba mapang Babar-i ball 82 nung run 94 yangluba ajanga pa rat-

ing point 13 angu aser pai point 865 nguteta pa indang career nung point timtiba nguteta liasü.

Paisa, SA den T20 asaya tasembuba nung ball 59 nung run 122 yanglua Pakistan team takok dangi ani.

Kasa mapang nung Fakhar-ia ita tepeyong kanga junga asayaogo. Pai South Africa den asayaba mapang century ana azük, kong tanabuba asaya nung run 193 yangluba densema lir.

Nepal nunger asayar Khushal-i, Netherlands aser Malaysia den tri-series asayaba mapang run timtiba yanglua liasü.

Pai asaya pongu nung half century pezü densema run 278 yanglu.

Tetsür cricket asaya nung Alyssa-i New Zealand den ODI asaya asem asayaba mapang run 155 yanglu. New Zealand madak takok anguba asayamung nung la run timtiba yangluba asayar liasü.

Kasa asayamung nung Australia tsürsa Megan-i wicket tenet agia la wicket timtiba agiba asayar aküm.

New Zealand tsür Leigh-i Australia den asayaba mapang tanabuba asaya nung wicket trok agi aser tatembangbuba asaya nunga wicket asem agia asayamung tepeyong nung wicket teku agi liasü.

Euro 2020 atema asayar 23 nungi 26-i ajungkettsü

Monupii/May 5, 2021 (Agencies): Taküm European Championship nung tokteptsü aliba linük team tem nem squad nung asayar 23 nungi 26-i ajungkettsü atema temelaba agütsüsü, ta Europe nung football achaayangba lokti UEFA-i sangdong ka ajanga Mongolbarnü metetdaktüsü.

COVID-19 wara pokteter aliba ajanga asayar kar dak danga tashidak poteta quarantine asütsüsa akümba ajanga asaya kar nung asayar agi anünga küma lir ta ser temzüing ozüing nung iba temelenshi bener aruogo.

IFAB Laws, Law 3 dak ajemdaker asayaba anogo squad nung asayar 23 dang züingoksemdaktüsü aser A-national team asaya atema goalkeeper asem densema substitutes timba agi 12 dang yudaktsüsü.

UEFA-i taoba ita, European Cup asayaba mapang team tem nem asayar pongu melena asayatsü atema temelaba agütsüsü ta jangjatsüogo. Iba asayamung ya June 11 nungi July 11 tashi asayatsü lemteta lir.

Maneni linüktem nem standby asayartem kwi shimner shimtsü atema temelaba agütsüogo, shirnok asayamung nung mezüingbuba asaya masaya tsüingda melenteptsüla.

"UEFA Executive Committee-i tanü UEFA EURO 2020 final tournament kecha tetsükdaktüsü makai asayatsü aser COVID-19 wara pokteter aliba maneni tokteptsü atema temzüing ozüing ka nung temelenshi bener aruba agizükogo," ta UEFA sangdong ka ajanga metetdaktüsü.

BILEMDANGANG

"Minyaktettsü ta bilemertemi inyaka alirtem minprong masütsüla."